



Optužnice za zločine u Višegradu i Jablanici, hapšenje u Ljubuškom Popovići ubijali zajedno sa Lukićem?

Tužilaštvo BiH podiglo je optužnicu protiv Jovana i Gorana Popovića, kojom ih tereti za zločin protiv čovječnosti počinjen na području Višegrada 1992. godine i poslalo je Sudu BiH na potvrđivanje. Popovićima se na teret stavlja da su od početka aprila 1992. do kraja decembra 1995. godine učestvovali u progonu, ubistvima, prisilnim preseljima stanovništva, protivzakonitim zatvaranjem, silovanjima, seksualnim ropstvima, prisilnim nestancima, uništenju i otuđenju imovine, nanošenju velikih patnji i povredi tjelesnog integriteta i drugim nečovječnim djelima slične prirode. Optuženi Jovan Popović se tereti da je u grupi sa više naoružanih pripadnika srpske vojske, paravojnih srpskih formacija i policije, koje je predvodio Milan Lukić (pravosnažno osuđen na doživotni zatvor), učestvovao, između ostalog, u napadu, pretresu, protivzakonitom ha-

pšenju i odvođenju muškaraca bošnjačke nacionalnosti iz njihovih kuća iz sela Rodića Brdo u općini Višegrad. Tom prilikom su zarobili četiri civila, odveli ih u Policijsku stanicu u Višegradu, gdje su ubijena.

Optužnica je podignuta i protiv Azema Ibrovića, Enesa Maksića i Jusufa Hindića za zločine protiv civila počinjene u Jablanici. Njima je na teret stavljeno da su u noći s 28. na 29. juli 1993. mučili i nečovječno postupali prema jednoj osobi u zatočeničkom objektu u Muzeju Bitka na Neretvi.

Postupajući po naredbi Tužilaštva BiH, policijski službenici SIPA jučer su na području Ljubuškog uhapsili M. B. osumnjičenog za ratni zločin protiv civilnog stanovništva. Iz SIPA su kazali da je, nakon kriminalističke obrade u službenim prostorijama ove agencije, ova osoba predata Tužilaštvu BiH na dalje postupanje.

A. B. Č.